

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na ____ sjednici održanoj dana _____ 2013. godine, d o n o s i

Z A K O N
O IZMJENAMA I DOPUNAMA ZAKONA O POLICIJSKIM SLUŽBENICIMA
ZENIČKO-DOBOJSKOG KANTONA

Član 1.

(1) U Zakonu o policijskim službenicima Zeničko-dobojskog kantona ("Službene novine Zeničko-dobojskog kantona", broj: 8/06, 20/07 i 9/09), u nazivu člana 4., iza riječi „nacionalna“ dodaju se riječi: „i polna“.

(2) U članu 4. riječi: "popisu iz 1991. godine" se zamjenjuju riječima: „posljednjem popisu stanovništva“.

(3) Iza stava (1) dodaje se novi stav (2) koji glasi:

„(2) U policijskom organu se promoviše ravnopravna zastupljenost žena i muškaraca u strukturi policijskih službenika.“

Član 2.

(1) U članu 5. stav (3) iza riječi „uniformi“ brišu se riječi: „u Federaciji“, a broj: „62/05“ zamjenjuje se brojem: „43/10“.

(2) Iza stava (3) dodaje se novi stav (4) koji glasi:

„(4) Ministar na prijedlog policijskog komesara donosi pravilnik kojim se propisuju uslovi i rok trajanja policijske uniforme“.

(3) Dosadašnji stav (4) postaje stav (5).

Član 3.

(1) U članu 10. stav (1) iza riječi „zakonima“ dodaju se riječi: „i propisima“.

(2) Stav (2) mijenja se i glasi:

„(2) Način vršenja policijskih dužnosti i ovlasti detaljnije se propisuje pravilnikom koji donosi policijski komesar.“

Član 4.

U članu 15. stav (4) riječ „privesti“ zamjenjuje se riječju „prevesti“.

Član 5.

U članu 16. stav (1) iza tačke c) dodaje se nova tačka d) koja glasi:

„d) koja narušava ili ugrožava javni red i mir ili ugrožava bezbjednost saobraćaja, ako se uspostavljanje javnog reda i mira ili otklanjanje ugrožavanja ne može postići na drugi način“.

Član 6.

U članu 27. stav (2) iza riječi „specijalne vrste oružja“ dodaje se zarez i riječi: "električni uređaji za privremeno onesposobljavanje“.

Član 7.

U članu 28. stav (1) riječ „ozbiljno“ zamjenjuje se riječju „očigledno“.

Član 8.

(1) U članu 29. stav (2) tačka b) riječ „uhapsi“ zamjenjuje se riječima „liši slobode“, a riječ „organima“ zamjenjuje se riječju „službenicima“.

(2) U stavu (4) riječi: „U svakom slučaju“ se brišu.

(3) Stav (5) mijenja se i glasi:

„(5) Policijski službenik može ispaliti hitac upozorenja ako bi se time postigao efekat zastrašivanja ili odbijanja izravnog napada od sebe ili drugog u cilju zaštite života“.

Član 9.

U članu 31. stav (1) riječ „protiv“ zamjenjuje sa riječju „na“, a iza riječi „pucanjem“ dodaju se riječi: „vatrenim oružjem“.

Član 10.

Član 32. mijenja se i glasi:

„(1) Policijski službenik koji je u toku vršenja dužnosti upotrijebio silu dužan je sačiniti pismeni izvještaj o upotrebi sile do kraja smjene u kojoj je došlo do upotrebe sile.

(2) Izvještaj iz stava (1) policijski službenik dostavlja rukovodiocu organizacione jedinice koji, uz svoje mišljenje, jedan primjerak tog izvještaja dostavlja organizacionoj jedinici nadležnoj za unutrašnju kontrolu u roku od 24 sata, a u izuzetnim slučajevima u roku od 48 sati od završetka te smjene.

(3) Ako policijski službenik nije u mogućnosti da podnese izvještaj o upotrebi sile, izvještaj podnosi njegov neposredni rukovodilac u roku iz stava (1) ovog člana.

(4) Organizaciona jedinica nadležna za unutrašnju kontrolu policijskom komesaru dostavlja mišljenje o zakonitosti i pravilnosti upotrebe sile u roku od osam dana od dana prijema izvještaja, a u izuzetnim slučajevima ovaj rok se može produžiti do 30 dana od dana prijema izvještaja.

(5) Policijski komesar ocjenjuje zakonitost i pravilnost upotrebe sile od strane policijskog službenika u roku od tri dana od dana prijema mišljenja organizacione jedinice nadležne za unutrašnju kontrolu.

(6) Ako policijski komesar ocijeni da je policijski službenik upotrijebio silu na nezakonit ili nepravilan način nalaže rukovodiocu iz stava (2) ovog člana da pokrene interni postupak radi utvrđivanja odgovornosti policijskog službenika.

(7) Policijski službenik oslobađa se odgovornosti ako je silu upotrijebio u granicama svojih ovlaštenja.

(8) Izuzetno od stava (1) ovog člana, policijski službenik koji je upotrijebio samo sredstva za vezivanje prilikom lišenja slobode, privođenja ili sprovođenja lica u svrhu njenog sigurnog transporta, sastavlja službenu zabilješku i dostavlja je rukovodiocu organizacione jedinice u roku od 24 sata.“

Član 11.

Član 33. mijenja se i glasi:

„Član 33.
(Obrada ličnih podataka)

(1) Policijski službenik, u skladu sa nadležnostima i ovlaštenjima koja su određena ovim Zakonom, kao i u skladu s posebnim propisima, obrađuje informacije uključujući i lične podatke.

(2) Prilikom obrade ličnih podataka policijski službenik postupa u skladu sa odredbama Zakona o zaštiti ličnih podataka („Službeni glasnik Bosne i Hercegovine”, broj: 49/06, 76/11 i 89/11), osim ako ovim Zakonom nije drugačije propisano.

(3) Policijski komesar donosi instrukciju o načinu obrade podataka iz stavova (1) i (2) ovog člana u skladu sa Zakonom o zaštiti ličnih podataka.“

Član 12.

Iza člana 33. dodaju se novi članovi 33a., 33b., 33c., 33d. i 33e. koji glase:

„Član 33a.
(Obrada ličnih podataka u policijske svrhe)

(1) Obrada ličnih podataka u policijske svrhe podrazumijeva obradu ličnih podataka koju vrši policijski organ radi sprečavanja i suzbijanja kriminala i održavanja javnog reda.

(2) Prilikom obrade ličnih podataka u policijske svrhe, policijski organ:

- a) dužan je voditi evidenciju o svim zbirkama ličnih podataka i prijaviti ih Agenciji za zaštitu ličnih podataka u skladu sa članom 13., 14. i 15. Zakona o zaštiti ličnih podataka;
- b) dužan je odvojeno voditi ove podatke od drugih informacija;
- c) ovlašten je, ako je to neophodno u policijske svrhe, kombinovati lične podatke obrađivane za druge svrhe;
- d) dužan je ograničiti sakupljanje ličnih podataka koji se odnose na rasno porijeklo nosioca podataka, njegovo vjersko uvjerenje, seksualno opredjeljenje, političko mišljenje ili pripadnost određenim pokretima ili organizacijama koje nisu zakonom zabranjene. Sakupljanje ovih ličnih podataka može biti provedeno samo ako je to neophodno za potrebe određene istrage;
- e) dužan je lične podatke označavati s gledišta stepena njihove tačnosti i pouzdanosti, a prije svega razlikovati lične podatke zasnovane na činjenicama od podataka zasnovanih na ličnim mišljenjima i procjenama;
- f) dužan je stalno i najmanje jednom u tri godine provjeravati da li su lični podaci neophodni za određene svrhe i nepotrebne podatke izbrisati;
- g) ne provodi provjeru iz tačke f) stav (2) ovog člana u slučaju obrade ličnih podataka u svrhu osnovne identifikacije izvršioca kažnjivih djela (evidencija otisaka prstiju i DNK i dr.) kada se brisanje podataka provodi po isteku pet godina od dana smrti izvršioca;
- h) ne provodi provjeru i brisanje u slučaju da je lični podatak stavljen u dokumentaciju koja nije automatski vođena i kada se postupa po pravilima arhivske službe;
- i) ne može vršiti obradu ličnih podataka posredstvom obrađivača.

(3) Za potrebe ispunjavanja obaveza iz stava (2) ovog člana, organi koji učestvuju u krivičnom postupku dužni su blagovremeno pružiti informacije o pravosanim odlukama i zastarjelosti krivičnog djela.

Član 33b.
(Korištenje ličnih podataka)

(1) Lični podaci obrađeni u skladu sa odredbom člana 33a. ovog zakona koriste se ako je to:

- a) neophodno za ispunjavanje zadataka policijskog organa;
- b) neophodno za ispunjavanje obaveza iz međunarodnog ugovora koji je zaključila Bosna i Hercegovina za ispunjavanje obaveza u okviru međunarodne organizacije INTERPOL;
- c) zakonom određeno;
- d) u interesu nosioca podataka ako je on dao saglasnost i ako je tu saglasnost moguće predvidjeti;
- e) neophodno da se izbjegne ozbiljna i neposredna opasnost.

(2) Lični podaci dostavljaju se na osnovu zahtjeva u kojem je potrebno navesti podatke o podnosiocu zahtjeva, razlogu i svrsi za koju lični podaci treba da budu predati.

(3) Podaci se mogu dostaviti i bez zahtjeva ako dostavljanje proizilazi iz zakona, međunarodnog ugovora ili se radi o dostavljanju za potrebe međunarodne organizacije INTERPOL, kao i u slučaju iz stava (1) tačka e) ovog člana.

(4) Ako je moguće, policijski organ, će prilikom svakog dostavljanja ličnih podataka, dostaviti i informacije o pravosnažnim odlukama organa, u vezi sa krivičnim postupkom.

(5) Neistiniti i netačni lični podaci ne mogu biti dostavljeni, a neprovjereni lični podaci moraju biti označeni prilikom predaje i mora biti navedena mjera njihove pouzdanosti.

(6) Korisnik podataka nije ovlašten za obrađivanje ličnih podataka u drugu svrhu osim one u koje su podaci bili dostavljeni.

(7) Izuzetno od stava (6) ovog člana, korisnik podataka može obrađivati lične podatke i u druge svrhe ako je ispunjen jedan od uslova iz stava (1) ovog člana.

Član 33c.
(Prava i ograničenja prava nosioca podataka)

(1) Policijski organ neće dostaviti informaciju nosiocu podataka, shodno odredbi Poglavlja III. Zakona o zaštiti ličnih podataka, ako bi moglo doći do:

- a) ugrožavanja ispunjenja zadataka policijskog organa u kontekstu krivičnog postupka ili
- b) ugrožavanja ovlaštenih interesa trećeg lica.

(2) U slučaju neispunjavanja uslova iz stava (1) ovog člana ili u slučaju brisanja ličnih podataka, policijski organ donosi odluku koju pismeno obrazlaže.

(3) Ako policijski organ ne obrađuje lične podatke koji se odnose na podnosioca zahtjeva ili ako bi s obrazloženjem odluke o odbijanju zahtjeva moglo doći do ugrožavanja ispunjenja zadataka policijskog organa, podnosilac zahtjeva obavijestit će se o tome da policijski organ ne obrađuje lične podatke podnosioca zahtjeva.

(4) Ako je policijski organ dobio lične podatke bez saznanja nosioca podataka, a koje će dalje obrađivati, potrebno je da o tome informiše nosioca podataka i u slučaju ako to ne može ugroziti ispunjenje policijskog zadatka ili interese trećih lica.

Član 33d.
(Obrada ličnih podataka umrlih)

(1) Pod ličnim podacima smatraju se i podaci koji se odnose na umrla lica.

(2) Prava nosilaca podataka umrlih lica izvršavaju se posredstvom nasljednika.

Član 33e.
(Objavljivanje ličnih podataka)

(1) Policijski organ ovlašten je da objavi lične podatke u potrebnom obimu, ako je to neophodno za potrebe osiguranja identiteta lica i potrage za traženim licima i stvarima.

(2) Obrada ličnih podataka, prema odredbama ovog zakona, ne podliježe obavezama propisanim Zakonom o slobodi pristupa informacijama („Službene novine Federacije Bosne i Hercegovine“, broj: 32/01 i 48/11).“

Član 13.

Član 34. mijenja se i glasi:

„Član 34.
(Evidencije)

(1) Policijski organ vodi evidencije o sljedećem:

- a) o licima koja su lišena slobode po bilo kojem osnovu;
- b) o privedenim licima;
- c) o krivičnim djelima, licima za koja postoje osnovi sumnje da su počinila krivična djela, oštećenim, kao i izvještajima o počinjenim krivičnim djelima;
- d) o izdatim prekršajnim nalogima i podnešenim zahtjevima za pokretanje prekršajnog postupka;
- e) o licima za kojima se traga;
- f) o predmetima za kojima se traga;
- g) o provjeri identiteta;
- h) o licima kojima je utvrđen identitet;
- i) o kriminalističko-obavještajnim izvještajima i izvorima operativnih informacija;
- j) o događajima;
- k) o upotrebi sile;
- l) o pritužbama građana i podnesenih zahtjeva za pokretanje internog postupka;
- m) o provedenim internim postupcima;
- n) o disciplinskim postupcima;
- o) o pozvanim licima;
- p) o daktiloskopski i fotografski registrovanim licima;
- q) o privremeno oduzetim predmetima.

(2) Pored evidencija iz stava (1) ovog člana, policijski organ može propisati sadržaj i način vođenja te voditi i druge evidencije koje sadrže lične podatke, a koje su propisane drugim zakonima.

(3) Uz evidencije iz stava (1) ovog člana policijski organ može radi efikasnog obavljanja poslova voditi druge evidencije koje ne sadrže lične podatke u skladu sa članom 33. ovog zakona.“

Član 14.

(1) U članu 36. iza stava (6) dodaje se novi stav (7) koji glasi:

„(7) Policijski službenik u vršenju svojih zadataka, rukovodit će se principima utvrđenim u Etičkom kodeksu za policijske službenike kojeg donosi ministar na prijedlog policijskog komesara.“

(2) Dosadašnji stav (7) postaje stav (8).

Član 15.

Iza člana 36. dodaje se novi član 36a. koji glasi:

„Član 36a.

(Zdravstveni pregledi policijskih službenika)

(1) Policijski službenik je obavezan da se podvrgne redovnom zdravstvenom pregledu koje organizuje policijski organ u odgovarajućoj zdravstvenoj ustanovi, u cilju utvrđivanja opće i posebne zdravstvene sposobnosti za obavljanje poslova i zadataka policijskog službenika.

(2) U izuzetnim slučajevima, na obrazložen prijedlog neposrednog rukovodioca, policijski komesar može policijskog službenika uputiti na vanredni zdravstveni pregled.

(3) Policijski službenik je obavezan da se podvrgne vanrednom zdravstvenom pregledu.

(4) Pravilnik o zdravstvenim pregledima iz stavova (1) i (2) ovog člana donosi ministar na prijedlog policijskog komesara, uz konsultaciju sa Ministarstvom zdravstva Zeničko-dobojskog kantona.“

Član 16.

(1) U članu 38. stav (1) tačka d) iza riječi „način“ dodaje se riječ „javno“.

(2) U stavu (2) iza riječi „ostavku“, dodaju se riječi „ili će mu prestati radni odnos“.

(3) Stav (3) mijenja se i glasi:

„(3) Policijski službenik u skladu sa ovim zakonom, nakon zaključenja ugovora o radu, obavezan je dati sve informacije o funkcijama i aktivnostima koje obavlja, kao i podatke o imovini kojom raspolaže, kao i informacije o funkcijama i aktivnostima koje obavljaju i imovini kojom raspolažu članovi njegove uže porodice.“

(4) Iza stava (3) dodaje se novi stav (4) koji glasi:

„(4) Članovi uže porodice u smislu ovog zakona su bračni ili vanbračni partner policijskog službenika, njegovi srodnici po krvi u pravoj liniji, usvojilac i usvojenik, staratelj i štíćenik te dijete bračnog prartnera (pastorak).“

(5) Dosadašnji stav (4) postaje stav (5).

Član 17.

U članu 40. stav (3) i (4) se brišu.

Član 18.

(1) U članu 42. mijenja se naziv člana i glasi: „Nivoi pristupanja policijskom organu“.

(2) U članu 42. u stavu (1) tačke a) i b) riječ „školske“ zamjenjuje se riječju „stručne“.

(3) U stavu (1) tačka b) iza riječi „najmanje“ dodaju se riječi: „završenim prvim ciklusom visokog obrazovanja 180 ECTS bodova ili“.

Član 19.

U članu 45. stav (1) iza riječi „kandidate“ dodaju se riječi: „uz primjenu člana 4. ovog Zakona“.

Član 20.

Član 46. mijenja se i glasi:

„Član 46.
(Opći uslovi za kandidate)

Kandidat za policijskog službenika mora ispunjavati sljedeće opće uslove:

- a) državljanstvo Bosne i Hercegovine;
- b) životna dob između 18 i 27 godina za početni čin policajac i do 35 godina za početni čin mlađi inspektor računajući do isteka roka za podnošenje prijave na javni konkurs;
- c) najmanje IV stepen stručne spreme za čin policajac, a najmanje završen prvi ciklus visokog obrazovanja 180 ECTS bodova ili VI stepen stručne spreme za čin mlađi inspektor;
- d) da ima zdravstvenu sposobnost potrebnu za obavljanje poslova policijskog službenika propisane pravilnikom iz člana 36a. stav (4) ovog zakona;
- e) da nije otpušten sa bilo koje pozicije u organima državne uprave, institucija sa javnim ovlaštenjima na svim nivoima u Bosni i Hercegovini ili vojne službe u Bosni i Hercegovini kao rezultat disciplinske sankcije;
- f) da nema bezbjednosnih smetnji u skladu sa Zakonom o zaštiti tajnih podataka ("Službeni glasnik Bosne i Hercegovine", broj: 54/05 i 12/09);
- g) da protiv njega nije pokrenut krivični postupak;
- h) da mu nije izrečena pravomoćna kazna zatvora za krivično djelo;
- i) da nije obuhvaćen odredbom člana IX.1. Ustava Bosne i Hercegovine."

Član 21.

Članovi 48. i 49. mijenjaju se i glase:

„Član 48.
(Oglašavanje)

- (1) Policijski organ oglašava slobodna radna mjesta.
- (2) Oglas se objavljuje u najmanje dva dnevna lista koji se distribuiraju u Bosni i Hercegovini i ostaje otvoren 30 dana od dana objavljivanja.
- (3) Oglas za popunu upražnjenih radnih mjesta sadrži:
 - a) broj slobodnih radnih mjesta za svaki od dva nivoa pristupanja,
 - b) opće i posebne uslove za zapošljavanje,
 - c) potrebnu dokumentaciju, rok i mjesto prijavljivanja,
 - d) vrste testova koje kandidati polažu,
 - e) druge uslove ukoliko je to potrebno.

Član 49.

(Komisija za provođenje procedure javnog oglašavanja za zapošljavanje)

- (1) Policijski komesar imenuje Komisiju za provođenje procedure javnog oglašavanja za zapošljavanje (u daljem tekstu: Komisija) u sljedećem sastavu:
 - a) tri policijska službenika sa činom samostalnog inspektora ili višim činom, koje bira policijski komesar
 - b) dva državna službenika zaposlena u Ministarstvu koji su raspoređeni na radno mjesto stručnog savjetnika ili više pozicije, koje predlaže ministar.
- (2) Predsjednik Komisije je policijski službenik sa najvišim činom.
- (3) Zadaci Komisije su:

- a) preuzimanje prijava,
- b) pregledanje prijave i priložene dokumentacije,
- c) vođenje zapisnika o radu,
- d) donošenje internog plana rada i rasporeda testiranja,
- e) utvrđivanje sadržaja testa općeg znanja, tema za pisani rad i pitanja za intervju,
- f) provođenje testiranja i utvrđivanje rezultata na testovima i ukupnih rezultata,
- g) obavještanje kandidata putem oglasne ploče policijskog organa o kandidatima koji će pristupiti testiranju, o kandidatima koji su isključeni iz procesa odabira, o rezultatima svakog pojedinačnog testa i o kandidatima koji nisu pristupili testiranju,
- h) dostavljanje policijskom komesaru liste uspješnih kandidata sa brojem osvojenih bodova na svakom testu i ukupnim brojem bodova, liste kandidata koji su isključeni iz procesa odabira i liste kandidata koji nisu pristupili testiranju,
- i) objavljivanje na oglasnoj ploči policijskog organa svih lista iz tačke h) ovog stava zajedno sa listom odabranih kandidata od strane policijskog komesara predloženih za upućivanje na ljekarski pregled i sigurnosne provjere u skladu sa brojem oglašanih slobodnih radnih mjesta i
- j) objavljivanje konačne liste kandidata koji se upućuju na osnovnu policijsku obuku."

Član 22.

(1) U članu 51. stav (1) riječi: „se obavlja“ zamjenjuju se riječju: „započinje“..

(2) U stavu (2) tačke od a) do d) se mijenjaju i glase:

- „a) test fizičke sposobnosti, uključujući ocjenu morfološkog statusa;
- b) test općeg znanja, uključujući pisani rad;
- c) intervju;
- d) drugi test koji policijski organ smatra potrebnim ili opravdanim“.

(3) U stavu (2) tačka e) se briše.

(4) U stavu (3) na kraju teksta tačka se zamjenjuje zarezom i dodaje tekst: „a svaki kandidat ima neometan pristup rezultatima svojih testova.“

(5) Stav (4) mijenja se i glasi:

„(4) Kandidati u skladu sa članom 53a. ovog zakona se upućuju na:

- a) ljekarski pregled i
- b) sigurnosne provjere.“

(6) Iza stava (4) dodaje se novi stav (5) koji glasi:

„(5) Komisija utvrđuje sadržaj testova iz stava (2) tačke od b) do d) ovog člana uz saglasnost policijskog komesara.“

Član 23.

Član 52. i 53. mijenjaju se i glase:

„Član 52.

(Odabir kandidata)

(1) Nakon što Komisija sačini listu uspješnih kandidata policijski komesar vodeći računa o članu 45. ovog zakona vrši odabir kandidata u skladu sa oglašenim brojem slobodnih radnih mjesta radi upućivanja na ljekarski pregled i sigurnosne provjere.

(2) Policijski komesar dostavlja listu odabranih kandidata iz stava (1) Komisiji radi objavljivanja na oglasnoj ploči policijskog organa.

Član 53.
(Pravo žalbe)

U roku od 8 dana od dana objavljivanja lista iz člana 49. stav (4) tačke h) i i) i 52. stav (2) ovog zakona svaki kandidat može izjaviti žalbu policijskom odboru iz člana 124. ovog zakona."

Član 24.

Iza člana 53. dodaju se novi članovi 53a. i 53b. koji glase:

„Član 53a.
(Upućivanje na lješkarski pregled i sigurnosne provjere)

(1) Kada policijski odbor odluči o svim podnesenim žalbama iz člana 53. ovog zakona policijski komesar sačinjava listu kandidata za upućivanje na lješkarski pregled i sigurnosne provjere u skladu sa brojem oglasenih slobodnih radnih mjesta.

(2) Ukoliko neko od kandidata ne zadovolji na lješkarskom pregledu ili sigurnosnim provjerama sljedeći kandidat prema kriterijima iz člana 45. i 52. ovog zakona se upućuje na lješkarski pregled i sigurnosne provjere.

(3) Nakon provedenog postupka iz stava (1) i (2) policijski komesar utvrđuje konačnu listu kandidata za upućivanje na osnovnu policijsku obuku.

Član 53b.
(Objavljivanje konačne liste)

Komisija objavljuje na oglasnoj ploči policijskog organa konačnu listu kandidata upućenih na osnovnu policijsku obuku."

Član 25.

(1) U nazivu člana 54. i u stavu (2) navedenog člana, riječ „radu“ zamjenjuje se sa riječima: „međusobnim pravima i obavezama“.

(2) U stavu (1) riječ „radu“ zamjenjuje se sa riječima „međusobnim pravima i obavezama za vrijeme trajanja osnovne obuke“, a riječi: „53. stav (3) ovog zakona“ zamjenjuju se riječima: „53a. stav (3) ovog zakona“.

Član 26.

(1) U POGLAVLJU IV, Odjeljak A. i u nazivu člana 58. riječ „Postavljanje“, zamjenjuje se riječju: „Zapošljavanje“.

(2) U članu 58. stav (1) iza riječi „obuke“ dodaju se riječi: „zaključenjem ugovora o radu“, a riječ „postavlja“ zamjenjuje se sa riječju „raspoređuje“ i umjesto zareza stavlja se tačka, a ostatak teksta se briše.

(3) Iza stava (1) dodaje se novi stav (2) koji glasi:

„(2) Oblik i sadržaj ugovora o radu podzakonskim aktom propisuje ministar na prijedlog policijskog komesara.“

(4) Dosadašnji stavovi (2) i (3) postaju stavovi (3) i (4).

Član 27.

U članu 63. stav (3) tačka a) iza zarez se dodaju riječi: „i rješenjem raspoređuje na radno mjesto,“.

Član 28.

(1) U članu 64. stav (1) riječi: „Takav premještaj može uključivati i premještaj na drugu lokaciju izvan trenutnog radnog mjesta“ zamjenjuje se riječima: „Rješenje o internom premještaju donosi policijski komesar kada je to u interesu policijskog organa“.

(2) Stav (2), (3), (4) i (6) se brišu.

(3) U stavu (5) riječi: „Na dobijenu naredbu“ se zamjenjuju riječima: „Protiv rješenja“.

(4) Stav (5) postaje stav (2), a stav (7) postaje stav (3).

Član 29.

(1) U nazivu člana 65. riječ „Privremeni“ se briše.

(2) U članu 65. iza stava (4) dodaje se stav (5) koji glasi:

„(5) Izuzetno, policijski službenik može biti trajno eksterno premješten u drugi policijski organ u Bosni i Hercegovini, na upražnjeno radno mjesto u okviru istog čina, na lični zahtjev policijskog službenika i uz pismeni sporazum policijskih organa.“

Član 30.

(1) U nazivu člana 72. iza riječi „Zaštita“ dodaje se riječ „dodijeljenih“.

(2) U stavu (1) na kraju teksta briše se tačka i dodaju riječi: „i u slučaju rasporeda na druge poslove usljed promijenjene radne sposobnosti.“

Član 31.

(1) U članu 75. stav (2) riječi: „vodi računa“ zamjenjuju se riječju: „utvrđuje“.

(2) U stavu (2) tačka c) riječi: „disciplinski postupak za težu povredu službene dužnosti“ zamjenjuju se sa riječima: „da nije izrečena disciplinska sankcija za težu povredu službene dužnosti ili da nije privremeno udaljen iz policijskog organa“;

(3) U stavu (2) tačka e) mijenja se i glasi: „da mu nije izrečena disciplinska mjera obustavljanja unapređenja u viši čin.“

(4) U stavu (3) iza riječi „najmanje“ dodaju se riječi: „završen prvi ciklus visokog obrazovanja 180 ECTS bodova ili“.

(5) Stav (4) u prvoj rečenici iza riječi „najmanje“ dodaju se riječi: „završen prvi ciklus visokog obrazovanja 180 ECTS bodova ili“, a u drugoj rečenici iza riječi „čina“ dodaju se riječi: „višeg inspektora u čin samostalnog inspektora ili iz čina“ i na kraju teksta briše se tačka i dodaju riječi: „ili završen prvi ciklus visokog obrazovanja 240 ECTS bodova.“

Član 32.

(1) U članu 76. stav (1) tačka b) mijenja se i glasi: „za unapređenje iz čina starijeg policajca u čin narednika, iz čina narednik u čin starijeg narednika - četiri godine u svakom činu;“.

(2) U stavu (1) tačka c) iza riječi: „sa VI stepenom školske spreme“ dodaju se riječi: „ili završenim prvim ciklusom visokog obrazovanja 180 ECTS bodova“, a na kraju teksta briše se tačka i dodaju riječi: „ili završenim prvim ciklusom visokog obrazovanja 240 ECTS bodova.“

(3) U stavu (2) umjesto tačke dodaje se zarez i sljedeće riječi: „u koji se ne uračunava vrijeme provedeno na probnom radu iz člana 63. ovog Zakona“.

Član 33.

U članu 78. stav (1) na kraju teksta briše se tačka i dodaju riječi: „na obrazložen prijedlog rukovodioca organizacione jedinice“.

Član 34.

U članu 79. stav (5) druga rečenica i stavovi (6) i (7) se brišu.

Član 35.

(1) U članu 80. stav (1) riječ „organ“ zamjenjuje se riječima: „komesar rješenjem,“.

(2) Stav (3) se mijenja i glasi:

„(3) Ocjenu rada policijskih službenika do čina glavni inspektor predlaže rukovodilac organizacione jedinice sa činom glavni inspektor.“

(3) Stav (4) mijenja se i glasi:

„(4) Policijske službenike sa činom glavni inspektor ocjenjuje policijski komesar, a policijskog komesara rješenjem ocjenjuje ministar.“

Član 36.

(1) U članu 81. stav (2) mijenja se i glasi:

(2) „(2) Policijski službenik koji je u toku kalendarske godine proveo na radu manje od 6 mjeseci se ne ocjenjuje.“

(3) Stav (3) mijenja se i glasi:

„(3) Protiv rješenja iz člana 80. stav (1) policijski službenik ima pravo žalbe policijskom odboru iz člana 124. ovog Zakona u roku od osam dana od dana prijema rješenja.“

(4) Stav (4) se briše.

Član 37.

Član 91. se briše.

Član 38.

(1) U članu 102. iza stav (1) dodaje se novi stav (2) koji glasi:

„(2) Izuzev osnova i ograničenja iz stava (1) ovog člana policijski službenik ima pravo na plaćeno odsustvo u slučaju dobrovoljnog davanja krvi: jedan dan po doniranju, ali ne više od 3 dana u toku kalendarske godine.“

(2) Dosadašnji stavovi (2) i (3) postaju stavovi (3) i (4).

Član 39.

(1) U članu 105. stav (2) iza riječi „krivična“ dodaju se riječi „ili prekršajna“, iza riječi „djelo“ dodaju se riječi „ili prekršaj“, iza riječi „djela“ dodaju se riječi „ili prekršaja“.

(2) U stavu (3) iza riječi „krivične“ dodaju se riječi „ili prekršajne“.

Član 40.

(1) U članu 107. stav (1) iza tačke c) dodaje se nova tačka č) koja glasi: „zloupotreba naknade za troškove prijevoza na posao i sa posla;“, a u tački š) na kraju teksta dodaju se riječi: „ili izbjegavanje obaveze ljekarskog pregleda;“

(2) U stavu (2) tačka a) mijenja se slovna oznaka „c)“ i glasi: „č)“.

Član 41.

U članu 112. stav (6) riječ „svaku“ zamjenjuje se riječju „težu“.

Član 42.

U članu 114. u stavu (1) i (2) riječi: „privremeno suspendiran sa zadataka i dužnosti koje vrši ili“ se brišu.

Član 43.

Član 122. mijenja se i glasi:

„(1) Policijskom službeniku prestaje radni odnos u slučaju kada svojevolumno da otkaz sa otkaznim rokom od 15 dana ili sporazumnim prestankom radnog odnosa.

(2) Policijskom službeniku po sili zakona prestaje radni odnos u sljedećim slučajevima:

- a) kada dobije ocjenu „ne zadovoljava“ na kraju probnog rada;
- b) kada navršši 65 godina života i zakonom propisan penzioni staž ili 40 godina penzionog staža;
- c) kada dva puta uzastopno dobije negativnu ocjenu za rad (član 82. ovog zakona);
- d) prestankom državljanstva Bosne i Hercegovine;
- e) zbog viška policijskih službenika;
- f) kada mu je za krivično djelo izrečena pravosnažna kazna zatvora u trajanju od najmanje šest mjeseci;
- g) kada mu je izrečena disciplinska sankcija prestanka radnog odnosa;
- h) kada nadležni organ penzijskog i invalidskog osiguranja utvrdi gubitak radne sposobnosti;
- i) kada neopravdano ne dolazi na posao pet radnih dana uzastopno;
- j) smrću policijskog službenika.“

Član 44.

(1) U članu 124. stav (2) iza riječi „službenika“ dodaje se zarez i riječi: „kandidata u procesu odabira za zapošljavanje“.

(2) U stavu (5) broj „20“ zamjenjuju se brojem „30“.

Član 45.

U članu 130. u stav (1) riječi: „31. decembra 2010. godine“, zamjenjuju se riječima: „31. decembra 2015. godine“.

Član 46.

U članu 133. stav (1) u tački f) riječi "zaposlenju (član 54. stav (2))" zamjenjuju se riječima: "radu (član 58. stav (2))", a iza tačke p) dodaju se nove tačke r), s) i t) koje glase:

- „r) uslovima i roku trajanja policijske uniforme (član 5. stav (4));
- s) etičkom kodeksu za policijske službenike (član 36. stav (7));
- t) zdravstvenim pregledima policijskih službenika (član 36a. stav (4)).“

Član 47.

(1) U članu 134. stav (1) tačka b) riječi "stav (2)" zamjenjuje se riječima: "stav (3)", a iza tačke b) dodaje se nova tačka c) koja glasi:

„c) načinu vršenja policijskih dužnosti i ovlasti (član 10. stav (2)).“

Član 48.

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Član 49.

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o policijskim službenicima Zeničko-dobojskog kantona.

Broj:
Datum,
Zenica

PREDSJEDAVAJUĆI

Sretko Radišić

Obrazloženje

I – PRAVNI OSNOV

Predloženi Zakon o izmjenama i dopunama Zakona o policijskim službenicima Zeničko-dobojskog kantona donosi se na osnovu člana 37. stav 1. tačka f) Ustava Zeničko-dobojskog kantona.

II – RAZLOZI ZA DONOŠENJE ZAKONA

Zakon o policijskim službenicima Zeničko-dobojskog kantona objavljen je u „Službenim novinama Zeničko-dobojskog kantona“, broj: 8/06, 20/07 i 9/09.

Donošenju Zakona o izmjenama i dopunama Zakona o policijskim službenicima Zeničko-dobojskog kantona pristupilo se radi usaglašavanja teksta sa propisima drugih nivoa vlasti u Bosni i Hercegovini, kao i radi harmonizacije propisa u oblasti radno-pravnog statusa, ovlaštenja i odgovornosti policijskih službenika u policijskim organima u Bosni i Hercegovini.

Ovim izmjenama i dopunama vrši se usklađivanje sa:

- Zakonom o ravnopravnosti spolova u Bosni i Hercegovini-Prečišćeni tekst („Službeni glasnik BiH“, broj: 32/10),
- Zakonom o zaštiti ličnih podataka („Službeni glasnik BiH“, broj: 49/06, 76/11 i 89/11),
- Zakonom o zaštiti tajnih podataka („Službeni glasnik BiH“, broj: 54/05 i 12/09),
- Okvirnim Zakonom o visokom obrazovanju u Bosni i Hercegovini („Službeni glasnik BiH“, broj: 59/07 i 59/09) i
- Uredbom o jedinstvenoj policijskoj uniformi („Službene novine Federacije BiH“, broj: 43/10).

U toku 2011. i 2012. godine uz koordinaciju EUPM-a održano je više sastanaka predstavnika policijskih organa u Bosni i Hercegovini na kojima se, na ekspertskom nivou, razgovaralo o međusobnoj harmonizaciji zakona o policijskim službenicima, te izvršena analiza potrebe za izmjenama i dopunama tih zakona na osnovu dosadašnje prakse i ustanovljenih potreba. Kao rezultat ovih sastanaka proistekao je prijedlog za izmjene i dopune zakona o policijskim službenicima koji je u istoj formi i istom sadržaju dostavljen svim policijskim organima, a radi pristupanja proceduri izmjena i dopuna zakona iz ove oblasti, te potom i donošenja ili izmjena odgovarajućih podzakonskih propisa. Uvažavajući taj prijedlog pripremljene su i ove izmjene i dopune Zakona uzimajući u obzir potrebe ovog Kantona, kao i potrebu otklanjanja nedostataka i pravnih praznina, koje su se pokazale u primjeni važećeg Zakona.

U nastavku slijedi pojedinačno obrazloženje datih izmjena i dopuna:

- Dopuna u članu 4. važećeg Zakona se vrši radi usklađivanja sa Zakonom o ravnopravnosti spolova u Bosni i Hercegovini. Izmjena u ovom članu koja se odnosi na popis stanovništva vrši se radi praćenja posljednjeg popisa stanovništva, odnosno prestanka praćenja popisa stanovništva iz 1991. godine.

- Izmjene i dopune izvršene u članovima 5., 15., 16. i 27. su navedene iz razloga usklađivanja sa propisima Federacije BiH koje se odnose na predmetnu oblast, kao i radi otklanjanja nedostataka koji su uočeni prilikom same primjene ovog Zakona.

- Izmjene i dopune u članovima 10., 33. i dodatim članovima 33a., 33b., 33c., 33d., 33e., te članu 34. vrše se radi obaveze usklađivanja sa Zakonom o zaštiti ličnih podataka BiH.

- Izmjena u članu 15. je izvršena radi otklanjanja terminološke greške, obzirom da je pitanje privođenja regulisano drugim odredbama ovog Zakona, a ovom odredbom se želi dati ovlaštenje policijskom službeniku da može vozilom prevesti lice koje je pozvano uz njegovu saglasnost.

- Dopuna u članu 16. je izvršena radi regulisanja situacije koja se dešava u praksi i odnosi se na privođenje bez naloga lica koja narušavaju ili ugrožavaju JRM ili ugrožavaju bezbjednost saobraćaja na naročito izražajan način i to samo kao krajnje sredstvo ukoliko se drugim dozvoljenim sredstvima ne postiže efekat, a sve radi brzog i efikasnog djelovanja policije na uspostavljanju javnog reda i mira u takvim slučajevima.

- Dopuna u članu 27. se vrši radi omogućavanja korištenja električnih uređaja za privremeno onesposobljavanje od strane policije, obzirom da su ovi uređaji savremeniji i sa su svojom primjenom u drugim policijskim organima pokazali znatnu efikasnost.

- Izmjena u članu 28. se vrši radi otklanjanja nejasnoće u pogledu definisanja stanja bolesti osobe prema kojoj se ne koriste sredstva prisile obzirom da „ozbiljna bolest“ ne mora biti nužno i jasno vidljiva na samom licu pa bi predstavljalo problem u praksi, dok je „očigledna bolest“ kao takva jasno i uočljiva na samom vanjskom izgledu lica – čovjeka.

- Izmjene i dopuna u članu 29. se vrši radi terminološkog usklađivanja sa drugim propisima (Krivični zakon, Zakon o krivičnom postupku), a uvodi se i ovlaštenje policijskim službenicima da ispale hitac upozorenja. Razlog za uvođenje ovog upozorenja je pozitivna praksa drugih policijskih organa, te harmonizacija sa drugim propisima u BiH koji regulišu policijske ovlasti, a količina hitaca je svedena na minimum – na jedan hitac, tako da su bilo kakvi negativni efekti ispaljivanja ovih hitaca eliminisani.

- Izmjena i dopuna u članu 31. se vrši radi gramatičkog usklađivanja teksta, te jasnog definisanja iz čega lice u vozilu u pokretu puca kada se i na takvo vozilo može upotrijebiti vatreno oružje.

- Izmjena člana 32. se vrši radi decidnijeg propisivanja postupka izvještavanja o upotrebi sile od strane policijskog službenika, te naročito pitanja rokova za postupanje i ovlaštenja učesnika u postupku pravdanja sredstava prinude ili utvrđivanja eventualne odgovornosti.

- Izmjena u članu 33., kao i dopune u članovima 33a., 33b., 33c., 33d., 33e., vrše se radi usklađivanja sa Zakonom o zaštiti ličnih podataka BiH i harmonizacije u ovoj oblasti sa zakonima o policijskim službenicima u BiH. Pitanje obrade ličnih podataka je na ovakav način regulisano Zakonom o policijskim službenicima Bosne i Hercegovine (“Sužbeni glasnik BiH”, broj: 27/04, 63/04, 5/06, 33/06, 58/06, 15/08, 63/08 i 35/09).

- Dopunom u članu 33a. regulisano je pitanje obrade ličnih podataka u policijske svrhe gdje je definisana svrha obrade podataka u te svrhe, te dužnosti Uprave policije u vezi s tim.

- Dopunom u članu 33b. regulisano je pitanje korištenja ličnih podataka u policijske svrhe gdje su propisani uslovi za korištenje i ovlaštenje korisniku ličnih podataka u druge svrhe.

- Dopunom u članu 33c. regulisano su prava i ograničenja prava nosioca ličnih podataka u vezi sa dostavljanjem informacija.

- Dopunom u članu 33d. regulisano je pitanje obrade ličnih podataka umrlih lica gdje je propisano da se to vrši posredstvom nasljednika.

- Dopunom u članu 33e. regulisano je pitanje objavljivanja ličnih podataka radi osiguranja identiteta lica i potrage za traženim licima ili stvarima, kao i izuzetak od primjene Zakona o slobodi pristupa informacijama u vezi sa obradom ličnih podataka.

- Izmjena u članu 34. vrši se radi propisivanja evidencija koje vodi Uprava policije usaglašena sa ovim izmjenama i dopunama Zakona i usklađena sa Zakonom o zaštiti ličnih podataka.

- Dopunom u članu 36. daje se ovlaštenje ministru Ministarstva da donese Etički kodeks za policijske službenike i utvrđuje obaveza policijskim službenicima rukovođenja po njegovim principima. Etički kodeks je izuzetno važan za policiju imajući u vidu da će se istim regulisati način međusobnog ili ophođenja sa građanima i drugim strankama, način ponašanja, držanja, istupanja, pitanje izgleda itd. Nepostojanje ovog kodeksa u praksi stvara probleme koji se ogledaju u neujednačenom shvatanju predmetne problematike i time i neujednačenoj praksi ponašanja policijskih službenika.

- Dopune propisane u dodatom članu 36a. se odnose na zdravstveni pregled gdje se propisuje posebna zdravstvena sposobnost za obavljanje poslova policijskog službenika, obaveza periodičnog podvrgavanja pregledima, kao i donošenje podzakonskog propisa kojim bi se regulisao sadržaj ljezarskih pregleda i način upućivanja na isti, a sve uz konsultaciju sa Ministarstvom zdravstva Zeničko-dobojskog kantona. Prema važećem tekstu Zakona nije bilo definisano ovo pitanje, pa su nedoumice i pravne praznine dolazile do izražaja poslije izvršenih periodičnih ljezarskih pregleda po kojima su utvrđene stanovite zdravstvene smetnje kod policijskih službenika.

- Izmjene i dopune u članu 38. se vrše radi sistematičnosti odredaba, prevashodno u definisanju prestanka radnog odnosa policijskog službenika kada se prijavi kao kandidat za izbornu javnu funkciju ili kada je imenovan na položaj unutar tijela vlasti u BiH, zatim propisivanju članova uže porodice, kao i momenta kada policijski službenik daje informacije o funkcijama i aktivnostima kojima se bavi on ili članovi njegove uže porodice.

- Izmjene u članu 40. – brisanje stavova (3) i (4) je izvršeno obzirom da je materija koju su regulisali, propisana dodatim članom 36a.

- Dopuna u članu 45. ja izvršena radi mogućnosti sistematične primjene odredaba ovog člana i člana 4. Naime, u praksi je problem stvaralo to da je policijski organ imao obavezu zapošljavati „najbolje prijavljene kandidate“ (član 45.) s jedne strane i s druge strane da „struktura policijskih službenika odražava nacionalni sastav stanovništva“ (član 4.), te je bilo nemoguće zadovoljiti obje navedene odredbe prilikom prijema policijskih službenika. Najbolji kandidati tj. oni koji su na testovima ostvarivali najbolje rezultate su trebali biti primljeni–zaposleni (član 45.) pa nije bilo moguće uvažavati potrebe za uspostavu nacionalnog sastava prema članu 4. imajući u vidu nacionalni i promovišući spolni balans.

- Izmjena člana 46. se vrši radi propisivanja općih uslova za kandidate za policijskog službenika uz prilagođavanje novom sistemu obrazovanja u BiH, potrebu za vršenjem sigurnosnih provjera prema Zakonu o zaštiti tajnih podataka BiH, te usklađivanje sa ostalim izmjenama i dopunama u Poglavlju II Zakona.

- Izmjene članova 48. i 49. se vrše zbog sistematičnog i hronološkog propisivanja procedure oglašavanja i testiranja kandidata, kao i jasnog definisanja zadataka komisije za provođenje te procedure i ostalih učesnika u procesu zapošljavanja policijskih službenika.

- Izmjene i dopune u članu 51. su izvršene radi usklađivanja sa ostalim odredbama zakona i radi jasnog definisanja redoslijeda radnji u postupku testiranja i odabira kandidata.

- Izmjene članova 52. i 53., kao i dopune u članovima 53a. i 53b. se vrše zbog smanjenja broja prijavljenih kandidata koji bi se upućivali na sigurnosne provjere i ljezarske preglede uvažavajući odredbe Zakona o zaštiti ličnih podataka BiH, a na taj način bi se izbjegli i suvišni troškovi kandidatima za ljezarski pregled imajući u vidu da bi na sigurnosne provjere i ljezarski pregled bili upućeni samo kandidati čiji rezultati testiranja ukazuju da

mogu biti primljeni u radni odnos obzirom na broj radnih mjesta koja budu objavljena za popunu.

- Dopuna u članu 53a. uzrokovana je načinom na koji je u prethodnim članovima regulisano objavljivanje javnog oglasa i testiranje, kao i odabir kandidata.

- Dopuna u članu 53b. vrši se radi obaveze komisije da objavi konačnu listu kandidata upućenih na policijsku obuku, a zbog transparentnosti postupka.

- Izmjene i dopune u članu 54. su povezane sa izmjenama u članu 58. i vrše se radi pravilnog redoslijeda u proceduri prijema policijskih službenika. Naime prema važećim odredbama ugovor o radu se trebao zaključiti prije obavljanje osnovne policijske obuke kandidata što je neprihvatljivo imajući u vidu da kadeti na obuci nisu u radnom odnosu. Prema izmjenama i dopunama Zakona, prije upućivanja na osnovnu policijsku obuku sa kandidatima se zaključuje ugovor o regulisanju međusobnih prava i obaveza u vezi sa obukom, a tek po uspješnom završetku obuke sa kandidatima se zaključuje ugovor o radu kada oni ustvari i počinju sa radom.

- Dopuna u članu 63. vrši se radi propisivanja forme kojom se policijski službenik raspoređuje na radno mjesto poslije završenog i ocijenjenog probnog rada.

- Izmjene u članu 64. vrše se radi otklanjanja nejasnoća u primjeni i pojednostavljenja instituta internog premještaja gdje je ukinuta obaveza internog oglašavanja imajući u vidu da se primjena te procedure pokazala nepotrebnom i neefikasnom, a kao razlog za interni premještaj propisan je interes policijskog organa.

- Izmjene i dopune u članu 65. vrše se radi uvođenja, u izuzetnim slučajevima, mogućnosti trajnog eksternog premještaja, a radi praktičnih situacija kada postoji opravdan interes kod dva policijska organa i lični zahtjev policijskog službenika.

- Izmjena i dopuna u članu 72. je izvršena radi regulisanja statusa čina policijskog službenika u slučajevima kada bude razvrstan u II kategoriju invalidnosti i zbog toga ne bude mogao obavljati poslove policijskog službenika.

- Izmjene i dopune u članovima 75. i 76. vrše se radi prilagođavanja novom sistemu obrazovanja u BiH u pogledu utvrđivanja uslova za unapređenje policijskih službenika u viši čin, te propisivanja da se probni rad kada policijski službenik ima mentora ne računa u vrijeme provedeno u činu. Takođe je ukinuta odredba koja se odnosi na kriterij za unapređenje - da se protiv lica ne vodi disciplinski postupak kako bi se ispoštovao osnovni princip - presumpcija nevinosti utemeljen međunarodnim aktima, kao i Ustavom BiH.

- Dopuna u članu 78. vrši se radi definisanja načina pokretanja inicijative za posebno unapređenje pa je tako propisano da rukovodioci organizacionih jedinica daju obrazložen prijedlog za takve slučajeve.

- Izmjene u članu 79. vrše se jer brisani dio teksta i stavovi nisu primjenivi, odnosno nema svrhe niti potrebe da policijski službenik prihvata radno mjesto ako se već ranije sam prijavio za to radno mjesto a imao je mogućnost i da se ne prijavi. Sklonosti koje su bile propisane u stavu (5) su nejasne i neprimjenjive jer se unapređenje vrši, kako je naprijed rečeno, za radno mjesto na koje se sam policijski službenik prijavi i niko ne može biti unaprijeđen, pa samim time ni raspoređen po ovoj odredbi, bez da se sam prethodno prijavi za unapređenje na konkretno radno mjesto.

- Izmjene i dopune u članu 80. i 81. se vrše radi otklanjanja nejasnoća prilikom primjene ovih odredaba u postupku ocjene rada policijskih službenika. Između ostalog propisuje se da se ocjena vrši rješenjem koje donosi policijski komesar, da prijedloge za ocjene daju rukovodioci organizacionih jedinica, te da policijski službenik koji je u toku kalendarske godine na radu proveo manje od 6 mjeseci neće biti ocijenjen.

- Brisanje člana 91. je u vezi sa izvršenim izmjenama u članu 64. Zakona.

- U članu 102. izvršenom dopunom je propisano posebno pravo policijskih službenika na plaćeno odsustvo u slučajevima dobrovoljnog davanja krvi.

- Dopune u članu 105. vrše se radi odvajanja uticaja prekršajne odgovornosti na disciplinsku odgovornost na isti način kako je to propisano za krivičnu odgovornost.
- Izmjenama i dopunama u članu 107. propisane su nove teže povrede službene dužnosti čije propisivanje je zasnovano na dosadašnjim praktičnim situacijama i stoga potrebi da se propišu.
- Izmjena u članu 112. vrši se radi omogućavanja pravilnog računanja faktora za pribrajanje bodova prilikom izricanja disciplinskih sankcija za teže povrede službene dužnosti.
- Izmjena u članu 114. vrši se jer je privremena suspenzija „sa zadataka i dužnosti koje policijski službenik vrši“ nejasna i neprimjenjiva prvenstveno zbog odredbe stava (5) istog člana, pa se ovom izmjenom nedvojbeno propisuje postojanje samo jedne vrste privremene suspenzije – suspenzija iz policijskog organa.
- Izmijenjenim članom 122. na sistematičan i potpuniji način je propisan prestanak radnog odnosa, gdje su obuhvaćene i praktične situacije koje prema važećem propisu nisu bile predviđene, te izvršeno terminološko usklađivanje sa drugim propisima.
- Izmjena i dopune u članu 124. vrše se radi propisivanja nadležnosti policijskog odbora da postupa po žalbama kandidata u procesu odabira za zapošljavanje imajući u vidu da je u izmijenjenom članu 53. ovog Zakona predviđeno pravo žalbe ovim kandidatima koju ulažu policijskom odboru. Produženje roka za postupanje policijskog odbora je propisano radi praktične nemogućnosti okončanja postupka imajući u vidu da se radi o drugostepenom postupku gdje se nerijetko od prvostepenog organa pribavlja spis predmeta za što je potrebno stanovito vrijeme, kao i da se nerijetko radi o kompleksnijim predmetima koji zahtijevaju više vremena za okončanje.
- Izmjena u članu 130. vrši se radi produženja roka za zapošljavanje policijskih službenika koji su zaposleni u nekom drugom policijskom organu u BiH, a zbog postojanja praktičnih razloga i situacija prelaska iz drugog policijskog organa u ovaj. U slučaju opravdane potrebe, moguće će biti zaposliti obučene policijske službenike, s tim da je krajnji rok za takvo zapošljavanje 31. 12. 2015. godine. Do sada u ovom policijskom organu (Uprava policije MUP ZDK) nije korištena ova mogućnost, ali možda u narednom periodu od dvije godine bude procijenjena potreba za tim zbog velikog broja iskusnih policijskih službenika koji odlaze u penziju, te je stoga predviđena ova mogućnost.
- Izmjena i dopune u članu 133. se vrše radi davanja ovlaštenja ministru Ministarstva za donošenje podzakonskih propisa koji su ovim izmjenama i dopunama predviđeni.
- Izmjena i dopune u članu 134. se vrše radi davanja ovlaštenje policijskom komesaru za donošenje podzakonskih propisa koji su ovim izmjenama i dopunama predviđeni.

III – FINANSIJSKO OBRAZLOŽENJE

Predložene izmjene i dopune Zakona o policijskim službenicima Zeničko-dobojskog kantona ne iziskuju dodatna finansijska sredstva u budžetu Kantona.

MINISTARSTVO UNUTRAŠNJIH POSLOVA
ZENIČKO-DOBOJSKOG KANTONA

MINISTAR
Rifat Delić